

(٣)

شبه الغيرة

نفس المكان ...

وبناس جُداد ...

شبه الملامح والوشوش لناس بُعاد

مش دول معارفى والصُّحاب؟؟

مش دى دعاء وده إيهاب

مش ده هشام ودى سحر وده عماد

ولأشبهه ناس تانية م العمر اللي فات

نفس النغم بتعيده من تانى الحياة

لحن و قديم بتكرره على توزيعات
أوقات يطول فبتعزفه أقصر ساعات
نكبر و تفضل القلوب عايزة تعيش زى اللى راح
وعشان ما احس بإنى حى
لازم أعيش عمرى الأكيد أنا شايفه رايح
لكن فى قلبى لسه حاسس انه جاي
ونبتدى نتوه ننسحب للى مضى
تطردنا غربه من الخرس للفضفضه
لحظات عجّزنا نعيشها فى الحاضر نعيشها فى ذكريات
ما لغربه هى قلب عايش فى الصبا
ساجناه ملامح فاضحة عدّى إيه فى عمره
بالثوانى والدقايق والساعات

القاهرة ٢٠٠٩/١٢/١٧